

惟清齋全集

座師梅庵先生歲屆懸車蒙

恩予告家居多暇自叙生平所歷爲年譜二卷復第其所著文字爲奏疏二卷文集六卷應制詩一卷梅庵詩鈔五卷玉門詩鈔二卷附詩餘一卷付之剞劂而命

廷珍

爲之序其端

廷珍

竊惟古今不朽之業有三曰立德

立功立言三者道本一原而才難兼擅言雖較德功爲未然考在昔名卿碩輔行誼垂竹素勲猷勒鼎鍾者其人或不文或雖能文而不足名其家求其能作吉甫之頌有子產之辭者代不數人故昔人序李韓合刻謂文公衛公易地皆然然會昌一品安能望日月之末光有

宋忠獻文忠二公所稱天下文章莫大乎是者而安陽之集儼之廬陵終難方駕信乎歐陽子之言曰文章之作多發於羈旅草野至王公貴人志得氣滿非性能而好之則不暇以爲蒙謂非其志不欲爲精神才力不能並銳故也先生早擢科第通籍以後由曹司陟詞垣登卿貳帥封疆行河轉漕厯試艱鉅出入中外凡數十年案牘舟車未嘗一日以息其於詞翰疑若不暇爲者乃其所作卓卓如此其殆歐陽子所謂性能而好之者耶抑其精神才力殊絕於人出其緒餘猶足陶鑄文人學士者耶先生古今體詩久爲藝林傳誦今復出其晚歲

所作並公私雜著都爲一集梓以行世夫而後先生之
所施於當世與其所欲施而未竟者皆可於斯文見之
而先生之言且與功德俱不朽已若夫性情之厚才識
之偉品格之高義法之密知言者於此當自得之
無似於修辭之學未有所窺不敢究論所以妙也
道光二年歲次壬午孟陬旣望門下士汪廷珍謹序

太宰鐵梅庵師以文學受

先朝恩遇宣猷中外負峻望五十年

今上初元賜三品卿銜以禮致仕功名垂竹帛文章壽金石而其生平自得或傳或猶未盡傳宜深人仰止之慕也詩奉 師教越三十年熟窺不朽之業立言爲重哀錄 師著滙爲鉅編請版行於世首列年譜二卷皆自紀六十以前閱歷建樹事實次諸體文八卷詩六卷多汰存者次玉門詩鈔二卷詩餘一卷旣集成 師笑而頷之曰子不慕好事矣乎何弗予規而予譽云者詩願竊有述焉

師之事

純廟也掌王禮十年廷試廣和敷_之能文爾時躬贊
奎隆禪授禪饗朝會巡藉_之狐諸大儀臯拜夔颺自公
載筆故其文典質而_之明兩典春闈三掄秋貢極藻鑑
天下人才之盛休沐餘暇進及門商榷今古間從當時
名公卿上下其議論有得輒書故其文深厚而邃密少
爲貴公子稍長爲貧諸生娛親友弟絃誦不輟偕吾
師母夫人研六法習詩射服官後無家計累職事舉而
學力日以強故其文本摯情而多善氣洎逢

睿皇親政留守鄴京轉督漕賦六東開府江左右節制

日籌畫治吏治民治軍治河及鹽粟盜賊諸劇務每於
極勞之際借江山之靈氣寫民物之痼癥卽政卽學初
無二致故其文與詩不屑屑摹某家某格而自無不麤
括而精到者迄乎西行萬里耳目益雄承平馭邊節旌
壯矣進爲翰林學士更進拜尙書皆塞外所遷官遭遇
之奇古所絕無宜其詩文亦爲古所未有晚乃偶綴詩
餘一卷以寄閑情備作家一體斯亦大儒不遺小道之
意也 師性博達當事敢爲無少顧忌與人交和易可
親不翁翁然可肝膽有畢露者居恒接士大夫外叢林
高行縱談慧業鈴轄下走竊聽吟聲往往於翰墨間無

在不行其真意 師今年七十繼此有作行衍爲續編
世之讀會昌長慶集者穆然想見當日風儀文如其人
斯集不讓二賢專美矣爰盥而識之

道光元年辛巳秋七月受業劉鳳誥謹序

道光二年夏

元

自嶺南入

觀謁座師梅庵先生於蔬圃中

師方引年懸車頤

和多暇導泉種花香以晚節出自編年譜及詩文全集

授

元

讀之

元

列師門三十四年矣獲聞緒論久且

師之德誼政績文章炳於

朝野者見聞爲尤確是以出都途次敬爲序焉

元

謂文

以經世詩以明志必根極乎道德錯綜乎事功陶冶乎

情性而後可垂諸久遠而不朽吾

師淵源家學篤誠

孝友墳簞敦倡酬之樂琴瑟誦靜好之風門內之行怡

怡雍雍如也名卿大夫縞紵之歡徧海內日以仁義爲

漸摩廉隅爲砥礪是以發爲文詞也粹而精所謂根極
乎道德也 師以文學侍從

純廟特達之知職掌邦禮恭值

大廷授受隆儀迭舉雍容賡揚於斯爲盛文衡叠柄藻
鑑人倫羣望仰如山斗

仁宗睿皇帝親政歷留都兵刑二部侍郎兼府尹事旣
而轉督漕運開府山東總制三江所至之區凡河防財
賦以兵誥禁察吏惠民諸善政靡不畢舉秉儒術爲經
濟切民物以恫瘝上太平經國之書譜陰雨黍苗之頌
案牘肄勞鉛槧不廢泊乎列節玉門擁旄紫塞旋起學

士晉階尙書每歷一官必展所學以期無曠厥職是以
發爲文詞也典以實所謂錯綜乎事功也 師蘊蓄閎
深臨事屢斷清名雅操歷躋顯秩自處無異儒素與人
接物和易推誠慷慨敦氣誼生平蹤跡所歷江河之浩
渺山海之雄深邊關之險要古蹟之顯晦人物之廢興
莫不寄諸翰墨抒以性靈淵乎浩乎靡窺涯涘已

今上御寓眷念舊臣 師以年近七旬引疾請致仕優
詔褒答晉秩

予告此後優游林泉綰綽麋壽娛心著述造道達源沖
以和浚而旨所謂陶冶情性者非乎昔吾 師巡撫山

左時采輯八旗詩進

呈蒙

賜名熙朝雅頌集

元奉

命恭撰跋語中有以忠愛發爲咏歌之語 師歟歷中
外垂五十年忠愛之忱至老彌篤則此集者德誼政績
文章一以貫之洵足爲

熙朝盛事

元

又以附名簡末爲幸焉受業揚州阮元謹

序

乾隆癸丑和成進士出梅庵先生門下厚辱期許得
備聞古今述作之旨嘗見公表進所輯八旗詩集一百
三十四卷

詔旨優答

賜名熙朝雅頌九牧之士且誦且歎服公政事之暇不
廢鉛槧蒐采繁富抉擇精審油然有餘裕也乃今讀公
詩文全集閱侈而鉅麗博厚而適雅如望江河洸汪澶
漫而不知所終始則固合八旗制作之彥而集其成矣
是非得天獨厚亦安能遽詣精蘊若斯之茂美哉公早
擢顯第迴翔翰苑陟卿貳領封圻防邊徼歷中外者

垂五十年讀之而可以得公生平出處之畧則有年譜
讀之而可以見公體

國公忠之誠則有奏議讀之而可以見公學術之正才
識之大則有古文集其他自廢

明盛以及交友懷人感時觸物榮瘁欣戚寄諸有韻
之文於是山川之憑弔關塞之險阨雲物之沃蕩風俗
之異同人事之代嬗日月之遷流無不畢陳倏然淵其
志和其情蘊乎其猶模繡也富哉言乎歎觀止矣

今上建極之初以公老成宿望方切嚮用而公深維止
足之義特請懸車遂以三品卿秩

予告歸第俾優游頤養以著述自娛則造道資深而又
得假以寬閒之歲月者謂非遭遇之極隆歟集凡十八
卷皆公所手定而命和以一言序之竊維李漢之於昌
黎蘇軾之於歐陽皆能知而能言者和則奚能爲役顧
自維少以文字受知於公言論風采親承有年詩云高山
仰止景行行止固深以得附姓氏爲幸也乃不敏以
不文辭而謹書數語於簡末

道光二年二月朔受業英和謹序

年譜之作昉自南宋編纂行事年經而月緯之吳仁傑之譜靖節少陵呂大防洪興祖之譜昌黎文安禮之譜柳州是已然猶屬異代也六一譜於薛齊誼南豐譜於朱子三蘇譜於何榆紫陽譜於李方子勉齋譜於潘植鄭元肅陳義和或親問業或私淑諸人信而有徵辭不虛美體例謹嚴洵有當乎編年紀月之法近代宛陵施愚山先生嘗自編年譜海豐吳二南尙書有蟻園自記年譜據事直書而品績文章大略可觀較之排比出自他人者更親且切讀者臆之宮保鐵公一代宗臣學者仰之如泰山北斗數厯中外垂五十年本經術以飾治

躋民物於春臺遭際

三朝知遇之隆爲九列百寮億萬軍民所傾心而仰鏡
所謂文武威風持大體有成績者更僕未可悉數蟠錯
屢試寵辱不驚讀萬卷書行萬里路沆能功在蒼生

眷優黃髮遺愛之碑與人之誦中和樂職宣布之詩至
今尙徧於吳魯齊楚之邦皆公之治譜也今公於

予告之年出手輯年譜見示且命

成憲

叅校綴言於後

憶公承命爲七省漕帥

成憲

方遷秩江安糧儲辛厠屬

吏旣公開府大京復以觀察堯沂備真節下晉督江南
特以賤名首登剡牘受公之知經今卅載凡公之實心

實政進賢退不肖率勵廉耻敦厚風俗而一一出之以

和神清節當與古名臣韓范富歐陽之立心行事並垂

不朽卽

成憲

曩時所親炙而奉行者若清漕之整綱飭

紀丁民交便張秋運道之堵築如期飛芻不後濟東兗

曹之菑區賑卹半載無一道確竟事無一詆牒皆大端

卓卓可紀可傳核茲年譜所載曾未及什之一二蓋公

之自視歛然過人遠矣公壘掌文柄得人最盛河汾門

下卿相林立而叅校綴言之役不於羣公是屬而偏屬

之白首郎潛疏賤不文之故吏者豈非以其克知灼見

信而有徵辭不虛美耶公之諱古文詞駕愚山先生而

上之其陰德及人之善政視二南尙書有過之無不及
則世濟其美必有如二南尙書令子之兄弟並持節鉞
及愚山先生曾孫之重釐年譜者理有固然福有自致
頃公手輯以壽屆七旬爲準繼自今午橋獨樂歲月正
長安車蒲輪

恩綸特召慶

累朝之耆舊躋千叟之壽筵大書特書不一書正未有
艾稽諸有朱葉信公之譜編于子應支范文正公之譜
編于五世孫之彙行見續筆經繩詰嗣輩門施行馬閱
十年而一辭成憲雖目眇頭雪尙思屢爲叅校而敬陳

於我公書策琴瑟之前也

道光元年太歲在辛巳秋八月之朔魏成憲謹跋

天爲國家生名世之人則必有名世之用所以黼黻隆
平潤色鴻業抒才猷爲經濟本學術爲文章使其著述
旣足顯於當時而必揚於後世則人不徒藉文以傳而
文實自因人而重豈偶然也哉唐有韓白宋有歐蘇尚
已吾師鐵梅庵先生鍾乾坤之間氣秉河嶽之淳精通
敏性成宏偉博達篤嗜墳典百家六藝之篇靡不究覽
洞貫大義不屑屑爲章句之學善詩歌負奇氣爲文辭
操筆立成才識高邁時爭傳誦鸞龍之質自少已然矣
蚤歲通籍佐銓政綜理優贍獨持簡要見重宰執嗣以
文字受

純皇帝特達之知超遷學士游陟容臺精白一心分典
三禮表章制度夙夜惟寅兩典春闈屢司文柄壬子莅
江南甲寅厯山東戊午任順天得士稱極盛洪河北斗
學者翕然宗仰之

睿皇帝親政由少宰遷少司農兼尹陪都時漕政疲敝
命公督運江淮軍儲用濟自是出撫山左總督兩江受
寄方崇許身彌確所至興利除害飭紀振綱勵學校戢
姦宄濬河渠嚴海防相度機宜匡正民俗其紆籌之良
策幹濟之嘉猷精深詳密一一具見于奏疏中及下僚
侵賑事發公被累往涉輪臺萬有餘里單車就道寵辱

不驚器量過人遠甚矣尋起公學士綬理回疆旋膺
內召於是有玉門詩鈔回疆土俗諸記再掌宗伯晉領
天官方竭公忠勤思寅亮復以回疆疑獄謫赴吉林公
旅居數年屏謝人事惟以文字自遣初爲少宗伯時曾
奉

命纂八旗通志撫山東之日進所選八旗詩

賜名熙朝雅頌集皆煌煌乎鉅儒報國之文也舊著梅
庵詩鈔早行於世碑版諸刻書名馳海內久矣

睿皇帝知公學問復起爲洗馬今

上御極眷念耆舊方欲擢用公時患目疾以年躋七旬

鑒大夫懸車之義因乞致事

恩旨優允晉爵家居樂志頤和翛然林下迺取自著年譜并前後所作賦序傳記雜說諸篇及舊刻詩鈔附以詩餘釐爲六卷題曰惟清齋全集投

元錫讀之元錫自

維謫陋弱卽受知趨承函丈者幾三十年於茲矣習見公內行醇備氣節森然常居大臣之位獨耽儒素之風服官

三朝耆德昭灼敷歷中外政在邦家雖屢躋屢起經綸之大未究其川而潛作之業因以益宏進退雍容出處一致甯非道充養邃而能然哉近窺官牆之美富得聞

夫子之文章本乎性靈輔以學力昌明雅健樸茂淵深
大則元氣之包含細則川流之條析陶鈞六籍吐納羣
言篇帙之中諸體盡善是以神與古會趣若天成卽偶
然涉筆亦皆有卓識精理以蘊乎其間學者讀公之文
知公之學蓋才力之得於天者厚也豈不信哉其昭今
而垂後固宜公自序尙言不敢追抗古人何辭之謙而
心之善下也 元錫愧無子貢有若之智不足以仰測高
深顧竊念叨與編校之役得綴名簡末以自附於不朽
之例其亦厚幸已夫

道光元年歲次辛巳秋七月中澣受業馮元錫謹序

梅菴全集總目

梅菴年譜二卷

奏疏二卷

梅菴文鈔六卷

梅菴詩鈔五卷

應制詩一卷

玉門詩鈔二卷

附詩餘一卷

梅菴年譜卷之一目錄

一歲至五十三歲

卷之二目錄

五十四至六十歲

梅庵自編年譜

長白

乾隆十七年壬申正月十四日丙

乾隆十八年癸酉

余二歲

乾隆十九年甲戌

余三歲出痘極危醫者謂次日五更頭頂一粒如不起卽不救

輝赫太夫人坐守至五更果明潤可愛急延醫來視賀曰得生矣

乾隆二十年乙亥

余四歲

乾隆二十一年丙子

余五歲

乾隆二十二年丁丑

余六歲是年

先大夫淳齋公由侍衛授甘肅鎮海營叅將余隨任

乾隆二十三年戊寅

余七歲

乾隆二十四年己卯

余八歲是年弟閩峰侍郎生

乾隆二十五年庚辰

余九歲

乾隆二十六年辛巳

余十歲是年出就外傳

乾隆二十七年壬午

余十一歲是年

淳齋公陞陝西神木協副總兵余隨任

乾隆二十八年癸未

余十二歲

乾隆二十九年甲申

余十三歲是年

淳齋公奉差伊犁脩築惠遠等城工余回京

乾隆三十年乙酉

余十四歲

乾隆三十一年丙戌

余十五歲

乾隆三十二年丁亥

余十六歲是年入

國子監肄業

乾隆三十三年戊子

余十七歲是年

淳齋公伊犁差竣歸

授直隸泰寧鎮總兵諭保曰我家世武職汝獨喜習
文固大好事然須自量無兩誤蓋以親友中多勸保
改習

國書也保對曰兒計之熟舉業雖難自受書以來攻
苦六七年於制藝及詩古文詞自覺有得若舍而習
國書無論前功俱棄且隨任出京亦無通曉繙譯者
朝夕講求是兩失也願專攻舉業以求一當

淳齋公深器之命自擇師同赴泰寧卒業焉

乾隆三十四年己丑

余十八歲

乾隆三十五年庚寅

余十九歲是年應順天

恩科鄉試中式第二十一名舉人出劉文定相國觀
文恭中丞兩先生門下房薦則朱春圃先生蔡元也
榜後娶夫人寧古塔氏內閣侍讀學士巴公諱巴克
棠阿次女

夫人字如亭一字竹軒歸余後始識字讀四子書及

唐宋人詩時作截句楚楚有致喜大草書十七帖素
師自敘帖日不離手興酣揮灑極有天趣性曠達識
大體凡婦人女子可喜可愕之事俱不經意每發一
議多不類閨閣中語而心氣和平與人寬厚以故相
余數十年多所贊襄如師友焉

乾隆三十六年辛卯

余二十歲是年春余以疾未赴禮部試遂延徐墨汀
先生高弟童湘岩先生下帷鍵戶簡練揣摩爲來年
必售計

乾隆三十七年壬辰

余二十一歲是年會試中式第十一名進士座主爲
劉文定奉碩廷汪持齋三先生房薦卽今大宗伯王
春圃先生懿脩也

殿試以策小疵抑置三甲

賜同進士出身

授吏部文選司額外主事

余性放達不喜爲尋行數墨之文易數師皆不相得
湘岩先生一見余文卽大喜過望日取啟禎

國初諸大家文朝夕講貫余亦相說以解皆游其堂
與遂魁甲榜余又喜作詩舉業之暇寢食於李杜韓

蘇諸集與先生唱和成帙是以余詩無纖巧浮靡之氣湘巖先生之力也

乾隆三十八年癸巳

余二十二歲

乾隆三十九年甲午

余二十三歲是年三月

淳齋公卒於泰寧鎮署余迎柩歸葬於東地先塋先是淳齋公節省厯年馬乾銀兩除爲兵丁製皮衣禦冬及修整本營軍裝外尙餘存五千餘金將備咸請以爲余營葬之費余對衆諭之曰先大人鎮泰寧五

年絲粟無所取吾何敢於身後違先人意大利却之並取印甘結存案焉

乾隆四十年乙未

余二十四歲

乾隆四十一年丙申

余二十五歲是年五月補文選司主事十二月承襲恩騎尉故事吏部大選議官由司員議定具冊呈堂卽過堂掣簽從無堂上官自到部核議者時阿文成公自金川凱旋以大學士總理吏部忽欲面議各司員震懾威重俱有難色掌選郎中忠君德等推余獨

任其事翌日文成公至衆皆屏息竦立莫敢仰視余
從容敷陳共議官一百餘員無一素誤文成公由是
甚器重之

乾隆四十二年丁酉

余二十六歲是年補吏部員外郎

余負詩癖郎署事簡日與甘道淵劉虛白恒益亭相
唱和分題聯句朝夕無間暇復攜酒果游翠微山釣
魚臺薊門煙樹諸勝吟詠最多詩載本集

乾隆四十三年戊戌

余二十七歲是年三月補吏部郎中掌考功司印十

一月兼內務府六庫郎中阿文成公總理吏部兼人倫鑑保舉多不苟見余於公事認真心甚賞之然未嘗假以詞色每因公盤錯稿常十餘日不下同列悚惶余獨毅然不爲意又余於公私議處案件輕重權衡一本成例無所附和介然孤立不肯趨附當道文成公尤器重之是以由員外郎中以至副都統俱出文成公保奏余一生無他薦主也

乾隆四十四年己亥

余二十八歲是年五月調戶部顏料庫郎中仍兼吏部行走

乾隆四十五年庚子

余二十九歲是年補詹事府少詹事仍兼部行走十二月以部務呈誤左遷鴻臚寺少卿總校三分書是年弟闔峰舉於鄉

乾隆四十六年辛丑

余三十歲是年弟闔峰成進士改翰林院庶吉士

淳齋公宦橐蕭然捐館後家益落闔峰卽從余學宅東屋三楹坐臥其中督課甚嚴所作詩文俱經余改正盡得家學院中老槐一株大合抱忽生紫芝二其大如蓋奕奕有光上下輝映識者以爲兄弟濟美之

兆遂顏其屋曰槐芝軒

乾隆四十七年壬寅

余三十一歲是年補戶部員外郎

恒中允益亭名裕余鄉榜同年也善詩古文詞性高曠家貧不苟交游獨與余爲至契至是病革將屬纊余往視不覺隕涕中允灑然曰生寄死歸胡爲作此態瞋目少時復瞠目問曰吾身後若何余曰有吾在斷不至苟簡中允領之已復向余曰吾素寶山高月小研公屢索未予今永別以此爲贈呼兒取研至摩挲再四欠身授余曰研背有爪痕公善磨去毋損石

語畢不言視之逝矣余爲經理喪葬如禮又刻其遺詩墨卿堂集序而傳之復哭以詩詩載集中

乾隆四十八年癸卯

余三十二歲

乾隆四十九年甲辰

余三十三歲

乾隆五十年乙巳

余三十四歲是年二月題陞吏部郎中掌考功司印
三月補翰林院侍講學士仍兼部行走

乾隆五十一年丙午

余三十五歲

乾隆五十二年丁未

余三十六歲是年十一月充日講起居注官

乾隆五十三年戊申

余三十七歲是年三月轉侍讀學士十二月奉

旨補內閣學士兼禮部侍郎

余以講學膺阿文成公薦保舉副都統引見

高宗純皇帝素稔保名謂用副都統尙覺可惜引見後
卽命題考試五言排律一首踰三日又傳集科甲出
身大小諸臣以一詩一賦在軍機考試時冬月午刻

出題時甚促迫不及構思卽奮筆揮灑西初交卷同
考諸公尙未脫稿奏

上稱

旨欽定第一以內閣學士兼禮部侍郎改補有紀

恩詩載集中

趙生蕙葵崑山先生子也余幼時曾從崑山先生游
久無聞問趙生忽持名帖並先生舊改課藝來謁問
其來京之意則稱讀書無成欲充部院帖寫以圖微
秩余叩其所學雖未成立尙可造就因卽畱館食令
習理舊業爲之納監入塲是歲舉孝廉世其家學焉

乾隆五十四年己酉

余三十八歲是年補禮部右侍郎稽察四譯館管理
咸安宮學務兼鑲紅旗蒙古副都統二月充

經筵講官三月充會試副考官得錢楷等九十七人
時王文端相國充總裁余與管松崖閣學副之王公
數典會試深以各房薦卷爲不足盡憑欲細搜落卷
以拔真才余與管公同事搜羅無一卷不經主司之
目榜發多知名士不數年那彥成阮元劉鳳誥劉鏞
之榮麟錢楷胡長齡李鈞簡汪滋畹汪廷珍或擢部
堂或膺督撫會試得人之盛無逾此科

乾隆五十五年庚戌

余三十九歲是年充會試知貢舉

上科鄉試因謄錄舞弊監臨監試提調委員俱干部
議降革有差此次至公堂監試御史增至九員人人
以搜剔弊端爲事諸務掣肘余知貢舉一以鎮靜處
之與諸同官詳悉籌議謂去弊貴清其源不在多方
查察因面諭所官謄錄生入場卽嚴行考試擇其字
畫端楷者另立一班編成坐號試卷發謄亦編號數
卽照派定前後某人必寫某卷不准紊亂仍核對原
考筆迹無從弊混計日收卷旣速且妥謄錄百餘年

積弊至此革除同事者毫無間言嗣後各科俱遵此
法行

乾隆五十六年辛亥

余四十歲是年十二月轉禮部左侍郎時十一月

輝赫太夫人卒余扈

蹕灤河間

太夫人病卽

奏請省視得

旨後一日夜馳歸京邸猶得親侍湯藥焉

太夫人寬厚和平經理家政數十年內外井井

淳齋公捐館後慨然曰吾事畢矣一切付之如亭夫人深居頤養不與外事時余與閩峯俱貳京卿屢典試事館閣部曹半出門下每舉壽筵冠蓋之盛甲於都下享年七十有三病革時閩峯任盛京兵部侍郎顧左右曰六兒不來矣旣而諭余曰汝弟處不必致信國家事重伊得信方寸必亂何可以私廢公其識大體如此

乾隆五十七年壬子

余四十一歲是年五月射布靶中三箭

賞戴花翎八月充江南鄉試正考官得陳鴻緒等一

百十四人

余既膺江南主考

命以江南爲人文滙集之所萬二千餘卷甄拔爲難
深以搜羅不周難免遺珠爲慮入場後無論本房薦
與不薦無一卷不詳細披閱目腫腰痛心力俱疲榜
發多知名士不數年成進士者三十餘人史致儼中
已未會元潘世恩點癸丑狀元吳廷琛中壬戌會狀
一榜四元爲江南歷科所罕有先是余渡江宿浦口
馬氏公寓宅後有香櫟樹極叢茂結實纍纍余手摘
四圓攜入場相對匝月竟成佳兆出闈後遊棲霞諸

勝登最高峯得天外澄江穩不流之句袁太史枚極稱賞之詩載集中

乾隆五十八年癸丑

余四十二歲是年三月調補鑲黃旗漢軍副都統五月調補正白旗蒙古副都統充會試副考官得吳貽詠等百二人

乾隆五十九年甲寅

余四十三歲是年充山東鄉試正考官得孫珏等六十九人長子瑞元生

余在山左闈中可取之卷甚多獨未得元卷因就商

之副考陳公遠山陳云有兩卷局度開展可以擬元
余喜攜二卷上堂聞外間傳點送二場違式被貼名
單而二卷中已黜其一少頃各房考上堂五房有薦
卷極得意長吟批點十房王令過而觀之稱亦有一
薦卷與此正同檢出紅號卽擬元之卷也前後不踰
數刻而二卷俱黜時與遠山論鬼神事余曰卽此已
是不必更誇神奇矣又余有極得意一卷而三場殊
草草余怒欲取前卷痛抹置之徧覓不得牀頂屋角
無處不到了無蹤跡駭極悶卧默思此卷徧尋不獲
豈有陰隲不應黜置乎纔舉念而此卷正在案頭卷

布覆之不覺也再檢閱後場止薄弱而無疵遂中第
六爲登州楊生大受年五十卽其生平無他長不爲
咎心之事而已

陳公前取二卷旣廢至二十四日始得孫生卷燈下
薄飲快讀甚覺治意榜後得家信舉一子卽闕中定
元時也遂命名曰瑞元

是年余姊氏卒無出姊丈承公保年已望六無力置
妾余曉以嗣續事大必須急圖贈金百五十兩置一
妾不三年得子女各一女早天子竟成立現承襲世
職

乾隆六十年乙卯

余四十四歲是年充

恩科會試知貢舉本年復考侍郎以下至編檢各官
賦爲小陽春賦詩題爲黃花晚節香余詩中引用白
衣送酒事置第七引

見時

高宗純皇帝笑問爾素必喜酒何以賦詩不忘酒字因
奏以素性不飲歸而爲詩自嘲曰試罷歸來日未央
墨澁猶帶

御爐香都緣習用糟邱語博得

君恩笑酒狂一時傳爲佳話

嘉慶元年丙辰

余四十五歲是年充會試知貢舉

嘉慶二年丁巳

余四十六歲是年稽查右翼宗學

嘉慶三年戊午

余四十七歲是年八月調吏部右侍郎允順天鄉試
副考官得丁煦等三百人十二月調正白旗滿洲副
都統是年弟閩峯侍郎卒余與閩峯友愛最篤雖分
居朝夕過從無虛日閩峯病大漸慨然曰吾從幼隨

兄嫂今不可死於他所遂力疾移余宅東偏余與如
亭夫人親理湯藥數月如一日竟卒年方四十耳時
余典試入闈不及面訣出闈後奔赴喪所一慟幾絕
焉閻峯性端方少年老成不苟言笑詩工五言應制
體尤佳故由翰林入直

尙書房

高宗純皇帝大加器重擢之吏部左侍郎甲寅乙卯兩
典順天鄉試唯性過拘謹無一顰一笑不畱意局度
太緊余每勸之不能聽卒以拘執多慮得心氣病遂
至不起惜哉所著有閻峯詩鈔若干卷及門莫副憲

晉刻以傳之

淳齋府君身後並無宦囊止老屋二十餘間保定府老園地二十餘頃分居後余罄所有俱付閻峯以資日用閻峯卽世遺產俱交瑞齡瑞英二猶子執業焉瑞齡幼失學承閻峯侍郎廕余爲加捐主事在兵部行走嗣復加捐直隸州知州分發陝西

嘉慶四年己未

余四十八歲是年正月轉補吏部左侍郎總理咸安宮學務教習庶吉士二月因選司奏事未關白各堂余據實參奏得

旨儀親王不必管理吏部鐵保降補內閣學士仍兼辦各衙門事務三月調補盛京兵部侍郎五月調補盛京刑部侍郎兼奉天府府尹督理九邊門九月仍調補吏部侍郎兼正紅旗漢軍副都統十一月調正藍旗滿洲副都統十二月補漕運總督兼兵部侍郎盛京地方情形向與各省不同旗屯民屯各居其半旗屯事佐領將軍主之民屯事州縣府尹主之旗屯旣多於民屯將軍聲勢又大於府尹是以民屯多見凌於旗屯余莅任與將軍而言旗民一體但分曲直不分強弱嗣後如旗屯敢有欺凌民屯者必執法從

事嚴叅奏辦會新民屯兵差過境將民人騾馬逕派百餘頭騎坐經該屯喊稟余立白將軍欲行叅奏旗員悚懼卽將所派騾馬發還此後旗民相安各不侵擾又威遠堡邊門向有陋規凡過往商民卽單身行旅亦需交納銀錢出口貨物則任意勒索民以爲病余於蒞任謝

恩摺內夾片聲明儻再違禁索取財物定卽嚴叅發摺後以夾片示將軍卽檄飭該管門旗員將陋規全行革除民甚便之

又盛京刑部監禁應擬充發者不下二百人多係偷

挖黑菜私打牲口等罪名查偷挖私參至五十兩始
擬軍流今黑菜牲口山居愚民偶然犯禁所獲不敵
私參百分之一亦一律擬以軍流未免情輕法重當
卽聲明入告仍照舊例以枷杖完結如三次不改再
問軍流得

旨允行

又盛京向遇吉林黑龍江官兵過境到處騷擾民不
安居沿途居民遠避店鋪不開此次過赴陝兵三千
護送甚難將軍商之余余曰此甚易辦兵非處心擾
民不過因食物不敷又耗路費不得已而出此若令

沿途地方官將應用住房食物妥爲備辦俾得安飽
何慮滋事將軍甚喜卽懇施行余因傳諭地方州縣
謂兵差過境汝等若不妥爲安插致生事端總不免
賠累何如預爲籌備除沿途店鋪封估外每處派員
預備食物一飯一菜每名不過開銷二十文卽可鼓
腹又預先與帶兵將官詳爲示知令其約束所屬不
得仍前滋擾如犯必叅該官兵等旣感此舉爲歷年
所未有又懼余陳奏竟定以日住宵行秋毫無犯計
所費較之歷次兵差有省無浮官民胥便

嘉慶五年庚申

余四十九歲

時漕務困敝已極遲阻不行議者至欲加賦大忤

聖意余至悉心體察首革陋規卽就漕糧項下調劑
運務不加賦不借帑奏數十上一請將向例分給州
縣銀米改撥旗丁一請將旗丁應領行月米改給折
色一請令糧道親放運費以免層層剝削得
旨依議速行欽此

又以旗丁之累由於隨船屯田多年典賣以致生計
日窘欲爲回贖又苦無項可指奏請將改撥調劑旗
丁銀兩每船扣銀四兩封貯道庫遇有極疲旗丁藉

作幫貼餘存者卽畱爲陸續贖田之用得
旨所辦甚是欽此

二月調劑浙省運務奏請將浙省春耗米三斗內酌
撥六升給丁又各丁名下應領本色行月米石請令
州縣照依市價改折又各丁積欠庫項三萬九千四
百餘兩請分六年歸欸並請回空船隻於例帶土宜
六十石外照重運之例多帶二十四石奉

上諭所有浙江旗丁酌撥春耗米石及應領本色行
月米令州縣照市價交賣折給均著照江安二省一
體辦理以爲濟運之資至幫丁從前借撥行月食米

亦著照所請酌分六年扣歸款項以紓丁力其回空
丁船於例帶土宜六十石外並著加恩照重運之例
准其多帶土宜二十四石俾丁力益臻寬裕欽此

四月興武幫水手張湖廣紹興幫水手白文奎於邳
州地方勒加身工聚眾滋事拒傷本營千總曹濤打
壞漕船二十六號余聞報卽飭漕標參將馳往邳州
會同營縣嚴密查拏首從各犯全行就獲審擬馳奏
奉

旨本年漕政肅清幫船水手需索此等事自必有
鐵保聞信卽馳赴該處督飭查拏將兩案首從拏獲

尙屬安速所有地方文武及押運員弁應得處分俱著加恩免其查叅張湖廣著卽處斬傳首梟示白文奎著卽處絞俱在犯事地方辦理以昭炯戒所有案內爲從各犯仍著交刑部定擬具奏欽此

五月余督運北上時畱心體察山東直隸均有端派總兵大員駐劄河干往來彈壓聲勢足以鎮懾惟江南鎮江駐劄太遠自臺莊以下蘇州平望直接浙江杭嘉湖一帶僅有沿途營汛並無專員統攝易致疎虞奏請嗣後重運過境時浙江江南於沿河營汛例催之外添派副叅大員親駐河干專司防護得

旨自應如此辦理以資彈壓卽移咨江浙督撫一體遵照欽此

七月余酌定新漕事宜奏請詳定章程以期經久一曰嚴兌開二曰慎米色三曰選運弁四曰恤水手五曰節運費六曰籌公項七曰杜避運八曰選頭伍九曰禁閑貯十曰懲幫蠹十一曰謹護送皆得旨允行

又調劑江西幫奏請將旗丁應領贈軍半耗米石照浙江各船變價折給以昭畫一奉

旨著照所請按江浙之例交價折給並照原定每石

一兩九錢之數折給十分之七以資運費仍留三分以備回空食用俾丁力益臻寬裕欽此

向例通州石壩設立經紀一百名接運八省漕糧從外河雇備吊載船隻運赴大通橋交卸除題定應領公費及旗丁交米一石例給個兒錢二十二文外不肖經紀仍挑揀米色較量斛口有後手錢等名目旗丁受累無窮余督漕後一切陋規盡力革除例給外別無津貼其經費實在不敷若不一體調劑必不能期經久遂不分畛域奏請於原定個兒錢二十二文外每石加給制錢五文通漕約增給銀二萬餘兩在

旗丁於調劑項下每船少得錢三四千文爲數無多而經紀得此接濟辦公裕如自可守法奉公不致藉口需索儻加增之後仍有不法經紀把持勒貼有意遲延卽將現加之項停止並奏明交刑部按律治罪以昭炯戒奏上得

旨所辦甚是公正兩有裨益之舉依議欽此

十一月閩邸報

皇上於明年七月恭謁

祖陵余在奉天府尹任內時稔知從前承辦

大差多有流弊因據實條奏一將軍府尹各衙門餽

送土儀悉加裁革一出關後

御道宜照原開路徑就地勢高下但求平坦不必分外加高以免胥役藉端舞弊一

皇上駐蹕盛京除軍機大臣及近

御前各員外不得多占民房以免滋擾一出關後不准地方官拏民間車輛指稱官雇以免擾累奏上得旨所奏甚屬可嘉寔應嚴禁內修道拏車二節著總理行營王大臣並管理嚮道處大臣議奏欽此

嘉慶六年辛酉

余五十歲是年二月奉

上諭鐵保總司漕務諸弊肅清著交部議敘欽此時
余以江南境內河道淺澁剝船短少有妨運務奏請
將邳州之貓兒窩宿遷之窑灣陸家墩桃源之古城
溜等處逐段挑挖與長河一律通深又令旗丁於河
口自備剝船三百隻計需銀二萬餘兩卽於各船調
劑項下分作三年還欸並交山陽清河兩縣就近分
管則旗丁免守淺之苦民船少差役之累可以經久
無弊奏上奉

旨所有邳宿桃源等處河道淺澁之處自應上緊挑
挖另降諭費淳吳璥等籌辦矣至請令旗丁於河口

備剝船三百隻以濟挽運一節卽於各該船調劑項下扣出興造每船所扣無多而挽運迅速卽照所奏悉心妥辦務期經久無弊爲要欽此

時造船工料昂貴每隻百四十兩辦理尚有不敷正籌議間江西旗丁呈稱丁等蒙恩調劑每船得幫費不少爲永遠之利丁等俱有天良情愿以二丁公造剝船一隻稍効蟻誠余察其意諄懇遂允所請如期造成工料堅實九月余以北倉廩座爲南糧截卸之所楊村官剝爲北河挽運之需所關最鉅近年失修廩座倒壞船隻破損若因循不辦至全行廢敗時再

議興修必致費帑悞公殊乖政體查北倉舊存版四十八座先經天津縣估需銀一萬二千餘兩是年直隸被水成災無閒款可撥又不便請動庫項再四籌畫仍於漕項內籌款修理請先於天津道庫剝價項下墊用歸次後在南漕各糧道庫內旗丁扣存備公項下酌量提出歸款既免漕糧露囤之虞亦可以工代賑於津民甚有裨益至楊村官剝船除撥運餉鉛外共存船一千四百餘隻從前辦理既不認真本年又疊遭大水磕碰損壞俱不堪濟用請

旨飭令天津道詳細查明將應大修小修及粘補者

分爲三項其應用之項先儘本年應支油艚銀兩動用如有不敷卽令平日修艚不堅之州縣攤出以昭炯戒並飭楊村通判專司其事認真修艚不得有名無實奏上得

旨北倉厰座原爲南糧截卸之用自應及早修整旣經鐵保細加核算估修卽交陳大文派委天津府楊志信督同該縣認真修葺所有動支銀兩先在天津道庫剝價項下墊用俟鐵保將南漕存公之項酌量提出再行歸欵又楊村官剝挽運在所必需關係緊要從前承修各員並不認真修艚以致損壞若俟全

不可用另行修造爲費不貲亟應及時著落修補著
陳大文會同鐵保妥爲商酌或派天津道府各員經
管一面督同該通判將應行大修小修等項船隻一
律認真修艤務期工堅料實不得仍前草率爲要欽
此

是年因北河水決重九已過各幫尙在天津閒無食
米余立即籌欸每船分賞數石足供回南之用因傳
集各丁環跪河干面諭曰汝等艱苦本部堂已代爲
籌辦無微不至今時已過遲若不趕緊償歸有悞冬
兌之期致本部堂受過汝等何安人人各有天良本

部堂卽日南旋亦不派員督催悞不悞聽汝等爲之言訖開船南下各幫曉夜催償十月半全行過淮較往年尙早數日

四月余側室馬孺人卒於河成閘舟次年三十有五長子瑞元生母也孺人性端莊寡言笑十四歲侍余贊襄家政如亭夫人重之稱以姨而不名生一子二女病革稍有積蓄分散家人所存公中銀錢如數交清一絲不苟余因其子成立諭將來附葬以示優異

嘉慶七年壬戌

余五十一歲是年十二月補授廣東巡撫

余督漕四年無善可稱惟於籌運之暇學校營伍俱加意整頓頗有小效嘗彙厯年籌辦事宜得二十餘條約畧書石鐫之堂壁以告後任踵而行之庶不負余之苦心其畧曰余以末學猥膺督漕之任三年來補偏救敝日夕不遑復以學問未充閱厯不廣不能濟當時之務媿慙滋甚偶而耳目所及竭力舉行計二十二條時有小效所謂得尺則尺得寸則寸嗣後更有便於公事者隨時增益其於庶務或稍有裨乎僅掇其大畧眉列於後

一麗正書院原存銀六千兩發典生息嘉慶五年加

捐三千兩經費稍裕酌定正課五十名每名給膏火一兩五錢副課三十名每名八錢其有願住院讀書者再加給飯食銀一兩以資養贍

一育嬰堂向不分大小每月槩給銀三錢嘉慶五年起革除浮費酌定四歲以內者給銀四錢四歲以外者給銀六錢仍酌給以婚嫁之費

一義學止生徒數人亦無膏火虛應故事而已今將學旁空屋贖回拓寬修葺在書院課取諸生二入教讀酌定生徒六十名每月每名給銀二錢以爲紙筆之費

一在城四營兵丁遇有白事除例賞外給銀四兩在育嬰堂積存項下撥給每年約領銀四百餘兩

一上江徵米一石隨徵耗米一斗下江每石六升向係縣幫平分嘉慶五年將州縣一半銀米奏撥給丁以資運費

一浙江州縣收米一石向徵漕費錢百文數十文不等嘉慶五年照依江省辦法一體奏撥給丁

一江西各屬有隨漕徵存水腳銀米嘉慶六年奏明劃半給丁

一糧船水手身工向有定例嘉慶五年起重運每名

加給大錢一千文回空五百文在調劑項下撥給
一江蘇各幫調劑項下每船每年扣存銀四兩積存
道庫以備公用

一漕院衙門公項不敷嘉慶六年奏明在四兩存公
項下借出一萬五千兩發淮安府生息每年得銀一
千八百兩以備公用歲底將總數核明報部

一各幫全單嘉慶五年奏明徑由糧道送呈總漕總
漕移送坐糧廳轉呈部科查核並將糧道呈驗部科
文批裁革以免需索

一隨漕官役飯食向例按日給銀六分嘉慶五年起

每名每日加給三分其沿途催漕各官亦分別酌給盤費俱在淮安府生息項下動給

一四營弁兵差往提催糧船每日給飯食銀二錢兵一錢

一各省回空幫船嘉慶五年奏明每船多帶土宜二十四石

一捐貼快丁例繳造運銀一百六十兩近年疲累殊甚嘉慶六年奏明每名減繳銀三十兩在上江耗米變價兩淮運使息銀內湊撥

一通壩經紀個兒錢定例每石二十二文嘉慶五年

起奏明加給五文在旗丁調劑項下撥給

一北倉歷年久遠屢經水患半多坍塌嘉慶六年奏明動項修理在旗下扣存天津道庫剝價餘存項下生息歸款

一楊村剝船破壞不全嘉慶六年奏明修補將船戶工食如數給發不准稍有尅扣並設大小船頭以便稽查

一黃河口令旗丁添備剝船三百隻以便遇淺起用免致擾累商民每歲酌給修費銀兩交山清兩縣分

管

一浙江溫後處後台後嚴所金衢所各幫造船甚爲
疲累嘉慶七年奏明量減數隻糧灑通幫俟十年後
丁力漸殷再照舊數

一重運北上經過各閘壩俱用天關浮費甚多嘉慶
六年行令各幫置備天關一百三十四部分設各閘
可期一勞永逸

一旗丁應領各款錢糧大半在水次支領易爲花費
嘉慶五年奏明於途中按段支領以歸核實

嘉慶八年癸亥

余五十二歲是年正月調補山東巡撫賞戴花翎

閏二月余在漕督任內奉

旨交審江都縣民人方南昌爭洲一案引律失當承
審各員應得失入處分余謂事由核轉則處分重在
屬員案經稟商則主見決之大吏因自請議處而河
庫道許公兆椿蘇松糧道李公奕疇淮安府徐公端
均得邀

恩免議

臨清關務舊係本州管理前撫臣奏明由撫臣改派
丞倅專司其事余謂與其委佐貳不若任印官如有
虧缺印官尙可著追佐貳何能賠補且多一閑員亦

滋糜費奏請仍復舊制得

旨允行

東省各營屢派出師兵額多缺余蒞任後卽令鎮將按大小營就額設兵數內選擇年力強壯者派出十分之三授以技藝加意訓練合計通省可得五千勁旅又飭各州縣於民壯快皂各役內一體練習烏鎗各技藝移會附近營員訂期校演不必增兵增餉通省又可得健卒七千餘名並請於健銳火器營揀選叅遊四員發東委用以資訓練得

旨允行

三月奏請各府立昭忠祠奉

旨好足見留心欽此

溧源書院爲前明都司衙署因修理地基掘得舊炮三百餘位棄置院中余以軍器可用者自應歸入各營收貯不可用者卽應銷燬遂飭中軍叅將於教場演放得二百餘位分貯本標及城守三營其餘交厯城縣銷化留爲打造軍器之用奉

旨所辦是欽此

東省臨清德州濟寧各州縣回民極爲強橫往往聚衆滋事釀成巨案余甚慮之會原任副將馬兆瑞來

謁馬兆瑞乾隆丁未科武狀元臨清回籍也出師軍營因腿傷休致余見其年力方壯腿疾已痊特爲奏請起用奉

旨仍以副將用至是來謝余乃自撰訓諭回民告示令其親至各鄉勸諭俾安分守法余撫東二年竟無回民滋事之案

東省倉庫虧短余莅任後設法彌補奏定章程十四條設局清查總以上下各衙門裁革浮費各州縣節省銀兩核實歸款凡勸捐勑派擾累民生之弊一槩革除一分清年限前後依次歸款一分別本身前任

以昭公允一本身虧缺之員已離本任尙在東省者依限勒追未完之前不准題補委署一已離東省各員照限咨追如敢觀望遷延卽撤回東省不得藉詞交代清楚逍遙事外一叅革病故各員查明在嘉慶四年清查以前實係人亡產絕免其著追四年以後者照例咨追並著落現任人員酌提節省銀兩通融彌補一州縣墊用銀兩令司庫分別給領不得列入交代作抵以免牽混一虧挪之項不得以什物留抵一所虧庫項分別正款雜款先清正項一所缺倉穀按每石七錢先將穀價提存司庫一交代時不得虛

出通關如扶同徇隱惟最後出結之員是問一道府
爲親臨上司如有續虧該管道府按例分賠一此次
清查由該管府造冊送局如有隱飾着落該管府分
賠一本任虧缺不得推之前任儻有諉卸情節指名
嚴叅一此次彌補係就各州縣節省之數酌中核議
並非強人以難不得藉口彌補任意科斂奏上得
旨允行

余以外省習氣虧缺較多者調以美缺以爲調劑不
知舊欠未清新欠又起不肖州縣轉因虧空得以陞
調旣失用人之法又開倖進之門殊非政體定議省

中好缺皆以無虧之員題補使其出有餘以補無着之項既可興廉又可杜挪新掩舊之弊並請將庫項未清已經陞任之員撤回以昭激勸奉

旨外省積習往往於任內虧缺各員姑令赴任挪新補舊將就了事豈核實辦公之道所有李恩書張懷清二員着照所請卽令撤回俟未完各款交清再以相當之缺題補儻實有虧缺情事卽行嚴叅辦理欽此

九月余校閱各營稔知東省地當衝衢差使繁重營中本無公項凡有出差兵丁多以攤扣餉銀幫貼易

起勒索滋事之弊余謂馭兵之道約束不得不嚴體恤亦宜周到與藩司籌畫將藩庫積存馬乾等項動借本銀一萬八千兩交商生息按大小營頭或數十兩百餘兩均勻攤派爲兵丁幫貼之費奏上得旨允行

是月河決封印衡家樓淹及下游張秋一帶被水者十九州縣余聞報馳赴災所急飭地方官購備饘餅雜穀分遣佐貳吏役駕船給散又令附近州縣捐辦席片擇高阜處所搭蓋窩鋪俾災民有所棲止一面請

旨賑卹慎擇屬吏中素有賢聲者同知劉大紳等十餘人令其分赴各屬督辦賑務將行余於西門外置酒親送執杯垂涕諄諄告戒謂君等此去如果實惠及民不致官吏中飽則是

國家良有司本院賢師友必愛之重之逾格超拔不次保薦儻虛糜帑項坐視民死而不救是則百姓之豺虎本院之寇仇定行嚴叅令其身家不保余又往來工次路遇災民必駐節撫慰問其疾苦或親至賑局查勘人心感動無不實心辦理十九屬災民無流離轉徙者

是年大水奇寒余倡捐棉衣二萬四千餘件分給災民得免號寒之苦其捐數過多如商人劉光昌等皆奏賞加銜以示鼓勵

是時黃河大溜由張秋橫穿運河東趨鹽河由利津入海其回空軍船尙有十餘幫阻水

聖心懸厪余令總兵博興叅將八十督率弁兵會同漕員於西岸漫水坡內逐段測探插立標識並用小船分段照料全數渡入正河無一損失並將出力人員奏請量加陞賞以示鼓勵奉

旨本年黃水漫溢灌入運河漕船回空在張秋迤北

未渡各幫設法催拖現已全數渡入正河連幫南下
不悞開兌之期所辦甚好總兵博興着賞戴花翎仍
交部議叙叅將八十等冒險催僨守備周官等堵築
漫水並催僨船隻均着加恩賞給陞銜外委何普首
先探路着卽以河營把總陞用其遊擊李仲炳等員
交該撫分別紀功欽此

嘉慶九年甲子

余五十三歲是年二月次子瑞恩生三月加太子少
保遂名瑞恩張秋被水後凡保護運道堵築漫口賑
恤災黎各款所費不貲余先奏明以東省力量辦東

省事宜並不另請帑項二月河南馬撫軍慧裕以衡
工需銀緊急奏撥東省銀三十萬兩以濟要工

上以東省辦理災賑及籌辦疏築等事需項甚多焉
能再顧豫省降旨申飭並諭余毋庸撥給余謂衡工
將次合龍必得物料齊集方能一舉蕆事若遠撥別
省稍有遲悞所關匪細當即將留備本省工賑各款
內撥銀三十萬兩星夜解赴衡工奏上奉

旨鐵保心無畛域深得大臣之體欽此

是年南糧於二月下旬挽至張秋迤南一帶各漫口
水勢湍急余於對岸沙灘挑挖引河一道復於新築

東岸長隄多設絞關西岸民埵安橋帶纜以備提溜
又預調剥船散布各缺口接遞緯道猶恐水來不測
預備西河船隻以爲設立水站搭造浮橋之用派文
武員弁節節防護將重船挽過張秋一無疎失奏上
特旨褒美賞瑤帶釵黃辦荷包以示獎勵

三月奉

旨鐵保一切災賑事宜寔力愛民均臻妥協著賞太
子少保銜以示優獎余具摺謝

恩復奉

上諭此次辦理賑務寔屬以國事爲家事肫切妥協

全登衽席是以加恩於汝欽此

三月二十四日衡工合龍余卽日專派員弁無分晝夜尅期分辦張秋缺口官弁奮勉兵夫踴躍曹家單薄口門寬一百五丈於四月初四日堵築完竣其南壩口門寬一百十八丈亦於四月初六日一律完工先是各岸需費甚多官不能給余議令本處紳士倡義籌辦如濮州之金提曹縣之米家口鄆城之李家莊譚家口肥城之黃家口惠民之探馬哨利津之缺口蒲臺之天齊廟濱州之孔家口等處俱先經民力堵築堅實故曹家單薄南壩頭二處口門得以併力

修築旬日工成文武員弁奏請陞賞有差各紳士亦得邀

恩議敘是以人心鼓舞樂於從事帑不糜而成工速也余有堵築張秋漫口記備紀其事載本集中

五月余恭進所輯八旗詩

賜名熙朝雅頌集

御製序文冠諸篇首余具摺謝

恩奉

旨此摺亦刊入書內以垂不朽欽此摺載本集

余嘗論詩貴氣體深厚氣體不厚雖極力雕琢於詩

無常也又謂詩貴說實話古來詩人不下數百家詩不下數千萬首一作虛語敷衍必落前人窠臼欲不雷同直道其實而已蓋天地變化不測隨時隨境各出新意所過之境界不同則所陳之理趣各異果能直書所見則以造物之布置爲吾詩之波瀾時不同境不同人亦不同雖有千萬古人不能籠罩我矣學者多服予言

七月籌買倉穀向例每石七錢本屬不敷加以運價雜費實多賠累是以州縣藉端派累百弊叢生余以爲欲杜採買之弊先清賠累之源奏請津貼三錢其

銀卽在節省項下酌撥得

旨允行

是年秋禾大熟穀價大減奏奉

諭旨一念誠敬必蒙

天祐年豐民安吏治亦可整飭倉庫亦可彌補最爲
上瑞不可多得願卿益勉素志勿稍自滿勉之欽此
泰安兗州沂州濟寧州所屬共有泉四百八十四座
東省資以利運向來雖有泉夫專司其事不過虛應
故事不能深暢余旣委員分查復調有泉州縣逐一
面詢諭令實力疏通如所費太多不妨量爲籌欸總

期有裨漕運奉

旨認真疏濬務期一律深通俾來年重運得以暢行
無阻特賜哈密瓜一個

是年江南河口淺阻糧船不能及時歸次余恐本年
守凍丁力已疲明歲新漕不得寬爲調劑尤恐舵工
水手聚衆滋事一一條陳具奏奉

旨已蒙

天祐河路通暢矣汝存心公務獲福無量勉守寸衷
經久勿懈欽此

十二月奉

旨本年漕糧因災蠲緩共有一百餘萬石實在抵通者只敷明年三月之用山東漕船向係小米麥豆着酌量採買若干石就近解通或碾常平倉穀如期解京以資搭放欽此余遂請將本年所買倉穀儘數碾出俟明年東省漕船開行搭運赴通以免封船擾累奉

旨所辦俱妥欽此

余之撫東也友朋之老於外任者多勸余與屬員不可示以真意聽其自爲可則允之否則駁之其通融調停俱不可問恐事後引爲口實余不以爲然謂公

事繁難上下一心開誠布公彼此籌議尙恐不能有
濟若上下相蒙各存一心上不明示下不明告是視
屬吏盡小人而孤立於上其害有不可勝言者余莅
任後視屬員爲一體凡地方之瘡苦公務之掣肘皆
詳悉採訪時與屬吏明言如公過無不包涵儻涉於
私則立登白簡無少寬貸以故日與屬員相接情意
聯屬而界限分明無人敢干以私撫東二年遭衡工
水患住張秋者十閱月在省不過年餘而各屬彌補
庫項收實銀五十三萬採買倉穀六十萬二年中赴
京上控之案不過數件皆審屬虛誣官民俱相安焉

余視屬吏賢不肖界限最嚴有進省數日不見者有親赴寓所答拜者總以該員平日官聲爲斷三年大計舉上考者俱細列其政蹟以榜示同官不能任意爲高下是年州縣一等者七人部准後三人引疾歸里甘於恬退蓋所保多廉靜專一之士也

沂州屬風俗强悍兇惡棍徒爲害地方余蒞任後卽密加查訪得該處著名惡棍田氏五虎不法狀密飭該縣拏獲田坤父子二名並被拐婦人及本夫到案質對明確請

旨卽正法又冠縣惡棍戴老紅勾串縣胥霸據一方

蓄髮三年不剃私設木匱收取地丁官吏不能制余
採訪確實卽飭該縣徐霖會同營弁立往拏獲請
旨正法梟示又德州差役李鳳祥積年衙蠹無惡不
作舊案有誣姦致死婦命事案無證據不能查辦余
立將該犯拏獲監禁一面出示招告得其奸狀照例
嚴辦該犯瘐死州獄人稱快焉

鄒縣孟廟日久傾壞有司不敢請余議捐修共得銀
六千兩數尙不敷會嵯商劉姓感張秋捐賑奏賞加
銜之恩情願出費四千時余已陞任兩江起程之前
一日該商賁銀交運庫以備工用

梅庵自編年譜

長白鐵保梅庵

嘉慶十年乙丑

余五十四歲是年正月補授兩江總督

徐州古爭戰地風俗刁悍當四省之衝不逞之徒習爲拽刀手橫行鄉曲無所不爲又多奉邪教嘉慶八年宿州有戕官之案向設副將一員不足以資彈壓余建議改設總兵一員增馬步兵一千餘名具摺上奏其畧云查江南徐州府地方南連安徽之宿州靈璧亳州北接山東之兗沂二府其西則與河南之虞

城永城夏邑三縣接壤處沛宿蕭碭之衝爲四省之扼要古稱重鎮民俗强悍各該州縣地勢犬牙相錯匪徒易於藏奸又黃河兩岸每遇要工動輒集夫數十萬漕船往來尤關緊要上年宿州匪徒滋事距徐州僅數十里使徐州兵力強盛何至滋成巨案臣鐵保俱所目擊夫兵可百年不用不可一日不備與其懲創於事後莫若靜鎮於幾先臣前在京請訓時曾經面奏情形仰蒙

聖鑒茲查徐州現設河標左營副將一員馬步戰守兵八百九十名除分撥睢寧豐縣沛縣夏鎮等處防

守城池汛地及沿河催漕護解人犯等項差使外實在存城戰守兵不足二百名自徐州至督撫河漕諸臣駐劄之地相距五六百里至千餘里不等皆不能朝發夕至地遠則勢苦孤懸官輕則聲威不壯惟有仰懇

天恩俯准將駐劄徐州之河標營副將改爲徐州鎮總兵歸總督統轄仍就近聽總河節制卽將附近之蕭營及安徽之宿州營山東之臺莊營額設官兵改歸徐州鎮總兵管轄各營應領兵餉等項各歸本省支領其不敷戰守兵丁卽於江南督漕撫各標內酌

量抽撥足額毋庸另增養廉等項亦於本省通融籌辦至總河一標額設四營今旣劃撥左肅兩營改歸徐州鎮應請於漕標所轄九營內酌撥兩營歸總河管轄另撥沿河有漕一二營歸總漕管轄以符營制如此一轉移間不但四省扼要之區得重鎮彈壓日臻寧謐該處好勇強悍之民亦可藉行伍出身化無用爲有用矣四月二十七日奉

上諭鐵保奏將駐劄徐州之河標左營副將改爲總兵一摺現經軍機大臣會同該部議准具奏已依議行矣該處界連四省民俗強悍且濱河漕運往來一

切彈壓稽查均關緊要所有新設江南徐州鎮總兵著該督於所轄總兵內揀選二員請旨簡調欽此余因有徐州紀事詩

吳淞口爲出洋門戶前明時倭寇多由此入口

國朝海洋寧謐百六十年來從無盜賊滋擾近嘉慶八年九年洋匪蔡牽猖獗兩次上岸民居頗受騷擾余蒞任後卽親赴吳淞相度地勢妥爲籌備添設兵四百餘名築砲臺二座移江寧大砲四位置臺上兩岸建兵房數百間令兵丁長川防守又飭諭寶山等縣添派民壯數百名不時協防吳淞所恃者海多沙

線外洋大號船隻不能攏岸卽八九年蔡逆入口亦係換坐小船若得此重兵大砲合力防範匪徒斷不敢傍岸因於查看海口時將扼要巡防事宜詳悉具奏得

旨因地制宜所辦俱妥欽此故余總制四年之久蔡逆不時在洋遊奕從不敢一窺吳淞者防守之力也四川省有採買運京米三十萬石前督陳大文以江省本有帶運緩征漕米勢難兼顧奏請徑令川省原船押運赴邇余以川船向走長江從未經歷閘壩強使之去數千無賴水手難保不生事端且江省現因

洪湖盛漲僱覓民船運送料物搶護要工若再代運川米尤滋擾累因思淮揚一帶米價昂貴浙省亦春收歉薄現在煮賑不如將川米截留爲平糶之用俟秋成後另買新米搭運俾兩省災民同資果腹川楚船隻亦得早回實爲兩便奏上得

旨允行

川沙吳淞二營向隸江蘇提督管轄余以每年出洋巡哨防堵海口俱係蘇松鎮統領未免呼應不靈因奏請將二營改歸總兵兼轄以資節制得

旨允行

六月洪湖水漲淮揚被災余先捐廉散給口食復檄
調蘇藩捐監銀兩十三萬兩迅加撫卹然後奏聞奉
旨此次民田廬舍多被淹損自應亟爲撫卹卽照所
請行欽此

閏六月籌議河務具摺陳奏云竊查河務爲漕運攸
關海口淤高自前明河臣潘季馴疏稱雲梯關外沙
積成灘中間行水之路不及十分之一然海口故道
廣自二三里至十餘里若兩河之水全歸故道海口
可仍全復等語是海口視黃流爲通塞黃水藉清水
以刷滌自昔已然現經河臣徐端屢次親勘海口寬

千餘丈攔門沙之上過水深四五六尺實無壅遏其形勢尙較勝於潘季馴治河時且本年黃水六月二十以前並無倒灌入運全河俱東趨入海不見停阻設果壅遏爲患何以大河之水仍滔滔順流而東此理至明一言可決况從古無浚海之法亦無另改海口之處是此說竟可勿論洪湖淤墊前河臣靳輔疏載彼時湖水止存小河一道寬十餘丈深五六尺至一二丈不等今則汪洋浩瀚湖面寬數百里深二三丈不等較靳輔時大不相同又豈得反諉爲淤淺况清水之敵黃所爭在高下而不在深淺此說又可勿

論矣惟河身攙高誠有此病詢之在工員弁兵夫瀕河紳士僉稱嘉慶七八九等年黃河底淤高八九尺至一丈不等是以清水不能外出河口之病實由於此但黃河之通塞靡常變遷無定歷考載籍有時上滯而下通有時上深而下淺並有時上下皆深而中段忽然淺澀卽如徐州一帶素稱極險之工動輒泛漲近年水不出槽河底刷深豈盡人力所致且大河遼遠巨浸茫茫亦萬無水底挑挖之理是此說亦只可存而勿論矣參觀明臣潘季馴及前河臣靳輔等奏議其治河之法全不治此三病而前心致意於清

口誠以清水暢出則河腹刷深海口亦得順通而洪
湖不至泛溢一舉而三善備行之有效歷歷足徵臣
再四思維目下受病處與昔正同雖現在河身淤高
亦由歷久之間壩多傷各處支河漸塞以致清口日
淤下游受害治法尤以復清口舊規疏洪湖歸路爲
目下刻不容緩之急務前歲衡工合龍之後清口大
淤自惠濟祠至彭家馬頭一片淤成乾地至今仍由
引河行船黃水一長河口卽淺其病一也惠濟等三
閘金門年久損壞難下嚴板啓閉不靈其病二也洪
湖義壩掣通壩底被冲洩水太甚現在趕緊購料運

土以期堵閉其他四壩亦須大加修理其病三也爲
今之計惟有大修閘壩全復舊規去新受之病收舊
洩之利則借湖水刷沙而黃河治湖水有路入黃不
虞壅漲而湖水亦治至洪澤湖以數百里湖面水深
至數丈駭浪奔騰一遇西北風勢在危險欲藉湖水
以刷黃則不能不多爲收蓄欲多蓄湖水則不能不
保護石隄欲保護石隄尤不可不急籌去路若不設
法宜洩水長一尺則堰低一尺加到何處爲止臣與
河臣徐端通盤籌議洩水固宜收蓄異漲尤不可不
防今年湖水盛於往年全賴義壩減洩得保無事是

欲守護高堰先須將山盱仁義禮智信各壩壩底修砌堅固以備節宣俾得操縱由人下游不至泛漲然後由高郵大壩疏浚支河以通入海之路將人字河汴稻河鹽河一律挑通以疏入江之路均期復還蘄輔原開河道之舊則高堰可保而下游州縣亦不至受淹此又慎修五壩之節宣以衛下河田廬之至計而非目前苟且補苴之圖也現在同大小臣工悉心籌議並出示淮揚二府士著紳衿耆老有洞悉本地機宜者召令來淮虛心博採俟折衷定議然後派委精細妥員先往查看再與河臣親身履勘酌定辦法

奏明於秋汛後同力合作河員不足則兼派地方經費不足則薄藉民力務求一勞永逸之法以利漕運而奠民居事關重大不敢不慎於始以籌全局奉旨所奏甚爲明晰海口淤高已非一日從古無濬海之法亦無另改海口之處至於清口之通塞關係漕運往來鐵保於此專心致志洵屬扼要辦理近年來河水稍有增長卽至頂阻清水不能暢出河口因之阻滯挽運維艱卽如昨冬回空船隻歸次遲緩幾遭凍阻皆由清水力弱不能刷黃之故本年春夏湖水漲盛重運始得行目今清水消落黃河水勢漸長已

覺倒灌卽須起剝後方能挽渡此其明驗若不及早籌畫將來河口日見淤淺並此一線引河旋挖旋淤成何事體是此時治河卽所以治漕不可稍有稽緩至洪湖淤墊之說鐵保謂清水之敵黃所爭在高下而不在深淺等語所論固是但湖底不深則清水焉能多蓄是必蓄深然後水力裕如足以敵黃鐵保務當會同徐端通盤籌畫俟大汛過後將高堰五壩及各處閘壩支河應如何酌量施工之處妥爲經理總之疏清口以利漕運護石隄以衛淮揚其分洩清水入海入江之處固不可不熟籌去路然亦不可過於

宣洩以期蓄清敵黃此爲至要欽此

余一意嚴備海防連次拏獲洋盜蔡廷秀等十八名
周文達等十二名審明正法具奏奉

旨江蘇水師向於洋面緝捕事宜不甚熟悉亦從無
奏及拿獲洋盜之事今經鐵保等督飭營汛文武實
力巡防連獲蔡廷秀周文達等二案可見事在人爲
鐵保汪志伊督率有方游擊葛洪章通州知州張桂
林海門同知章廷楓奮勉出力俱屬可嘉均交部議
叙欽此蔡周二犯係起意行劫蔡廷秀劫過韓同興
商船殺傷水手姚朝玉身死周文達卽沈叙寶先於

乾隆五十五年聽從已經拿獲審結之陳泳林等在通州李家港行劫不知姓名客船布疋在逃未獲今復於陳家沙洋面行劫黃德興客船張魁六陳鎖持械致傷水手王七金義黃勝發秦香陸鎖陸秀芳過船搜賊均屬法無可貸梟示沿海口岸以昭炯戒餘犯分擬軍流有差

十月籌辦江省緊要事件一日嚴查災賑一日速辦新漕一日籌備海防一日整頓營伍一日急端士習奉

旨實心辦理持之以久欽此

十一月宿州匪徒余連勾結蒙城教匪樊名揚聚眾滋事余以該處民情獷悍素有拽刀等會又地當四省之衝若不迅速捕擒必致滋蔓飛飭徐州壽春兩鎮會合圍拿併咨安徽河南山東三省於毗連州縣派兵堵截余親赴徐州督率進剿十二月初二日徐州鎮喜明壽春鎮德成額分兩路進攻圍賊於亳州公紀寺賊匪執持鎗械捨命出拒官兵奮力衝殺復用排鎗進擊賊匪不能抵敵立斃二百餘名又拋擲火毬燒燬賊巢焚死四百餘名賊匪潰亂官兵四面兜裏截殺復斃二百餘名生擒二百餘名餘眾丟棄

刀矛跪地乞命無一漏網者計此次勦辦事宜於十一月二十三日聞警十二月初二日賊事旬日間殲除淨盡若調遣需時賊勢滋蔓卽未易撲滅矣其成功迅速蓋深得徐州改鎮之力遂將劉茂修習教授徒妄造咒語商同樊名揚余連蔡同印盛潮凡吳景山等起事謀逆及官兵勦捕情形具奏首犯劉茂修已被官兵殺死仍行剉屍余連李潮士盛潮望余勇卽王得成紀四劉朝貴等六名均凌遲示衆其擒獲匪黨石德等三十一名或已經入夥未敢持械抗拒或甫聽糾約卽被拿獲發往黑龍江給索倫兵丁爲

奴緣坐之婦女幼孩盛鄭氏王勝等五十二名給付功臣之家爲奴被賊虜脅之良民王漕陸劉氏等男婦幼丁六十九名概予寬釋在事出力人員均得邀恩議敘

嘉慶十一年丙寅

余五十五歲

汰黃堤捍禦黃流爲淮揚保障舊工卑薄余建議加高培厚被水災民亦得以工代賑隄成紀之以詩是年桃汛黃水甚大余慮伏秋汛水勢更旺預籌宣洩仍奏挑瘠峯山天然兩閘以分黃水上游之勢疏

治鹽河以分黃水下游之溜又疏通人字河芒稻閘以暢清水入江之路又於高堰石工預加子埝以防盛漲均得

旨允行五月初果清黃並漲勢極危險幸先事預防得以化險爲平無潰溢之患

特旨褒嘉余有挑人字河成紀事歌

上年清黃並漲淮揚下游一帶民田廬舍俱成巨浸余令署河庫道伊秉綬鎮江府鄧暉各帶銀兩購辦饘餅席片先行給散卽將該處連年被水百姓困苦情形入告懇請賑濟又余歷次辦賑深知官吏朦混

之弊專委道府大員督查並勸商人捐輸米石於正
賑之前分散接濟復率屬捐廉買米一萬餘石給放
猶恐三冬雨雪災民生計維艱復奏請借碾各縣常
平倉穀十萬石以資賑濟卽於閩省官員養廉項下
攤扣歸欵

籌議吳淞口防海章程分條陳奏一飭令沿海廳縣
嚴查往來船隻南漚杉板等船毋許出境上海提載
等船禁止打造其應行出口者驗明放行不許停留
挑運以杜偷漏一編查保甲由鄉鎮以及船戶照例
設立門牌書寫丁口年歲生業不許遺漏遷移者報

明給換流寓者一體編管所有閩廣浙省流民委員
查明造冊勒限一月內覓便回籍其船戶家農船魚
船隻數卽於門牌內註明攬載等船均給船照責令
行埠驗明方准寫僱一商船到口令各省會館董事
先審土音盤詰居址如有可疑者卽密稟查拿果係
真正商販始准進口銷售均各出具保結各省之船
出口卽由該省會館董事出結查驗放行倘有盜匪
假冒進口及私運米糧火藥出口之事將該董事一
併治罪如有爲盜匪囤積貨物銷買贓物者准其據
實首報卽將盜贓全行賞給一每年春秋二季派委

藩臬兩司親往察勘抽查船照門牌嚴申禁令如營
汛兵弁果能拿獲銷贓濟匪之犯卽將盜贓全行賞
給委員巡役等亦如之若無故妄拿希圖紮詐及誣
陷平民並將真正匪徒得錢賣放察出從重治罪該
管之備弁及委員等一體叅辦奏上奉

旨實力辦理期有成效欽此

狼山鎮標及漕標之東海鹽城河標之廟灣甸湖八
營兵丁每年夏秋二季支領本色冬春二季每石折
銀七錢五分近年米價昂貴折價不及三分之一余
以該八營兵丁均有巡江會哨及輪巡外海差使繁

多若不厚其養贍不足以示體卹奏請每石酌照一兩一錢支領以示體卹得

旨允行

十一月堵合減壩缺口先是淮黃異漲開放王營減壩分洩黃水乃掣動大溜全河直趨減壩由六唐河入海遂有黃河改道之議余恐水性無常若冒昧舉事則千百萬帑金俱歸無用是以徃復察勘議久不決至是溜勢急趨南岍仍循雲梯關故道入海趕緊堵合并挑挖舊河與海口等處以疏尾閭深挑毛家嘴陸家渡引河以救倒灌而改道之議始息

嘉慶十二年丁卯

余五十六歲是年四月因失察壽州張大勲案銷去
宮銜降爲二品頂戴仍兼兵部尙書都察院右都御
史十月間因秋汛安瀾

賞還頭品頂戴仍賞戴花翎

二月奏培黃河兩岍大堤江境黃河經屢年盛漲之
後灘面淤高大堤日形卑矮幾與灘面相平難資防
守而綿亘二千餘里帑項人夫均難應手因與河督
再四熟籌擇堤頂較寬者卽於臨河一面估加太堰
其堤頂過窄者幫寬大堤上加子堰擗節勘辦以資

保障得

旨允行

是年冬典武鄉試事揭曉後同榜來謁余延之以禮
喻以國家設科文武並重賴壽一帶民多材武倘皆
務正何難掇巍科作提鎮爲

聖世干城之選如不自愛誤入拽刀等會則身家不
保手書勸諭之詞申明禍福利害刊刻數百張分給
各武舉囑其回家散給子弟親戚廣爲勸勉賴毫獮
悍之風或可少息

淮揚運河兩岸隄工因頻年黃水倒灌河底日淤又

值上年清黃並漲高寶一帶處處塌蟄水大則無所容納水小又幾成平陸空重軍船往往阻滯隨時挑挖勞費無已奏請兩岸一律加高培厚得

旨允行

嘉慶十三年戊辰

余五十七歲是年三月

皇上巡視天津余赴

行在

陛見自黃新莊一路扈

蹕至津奏對十日將江南河工海防吏治民生諸大

事條晰面陳俱蒙

溫旨裁答並將現在擬辦要工及酌籌經費各款開摺呈

覽均荷

俞旨嘉納

是年潛山發蛟各山漲水悉歸淮河正陽關馳報長水二丈餘尺奔注洪湖又值暴風急雨臨湖各工處處着重而黃河上游萬錦灘又報長水二丈餘尺一時淮黃并漲非常危險淮揚徐三屬幾有不能保全之勢運河兩岸百子堂千根旗杆荷花塘先後漫溢

聖心憂厯四百里

廷寄絡繹馳問余先飭開放天然峯山兩閘以洩黃
流又開余家壩及信智兩壩以洩淮水親與河督董
率道將往來河壩竭力搶護四十餘晝夜未嘗交睫
在工各員亦人人用命不避風雨多方搶堵淮揚二
郡得免淹浸先是余因內河冲刷缺口降爲二品頂
戴事定

賞還頭品頂戴並

命將出力文武各員據實保奏分別甄敘

田五董際雲陳沛川俱係私梟首惡各分口岸收納

私稅無惡不作陳沛川與田五因爭口岸不勝赴縣
投首余欲藉陳取田赦其既往飭令緝拿田五以圖
進身陳遂踴躍感奮自帶壯丁百餘名會同營縣前
往捕獲遇田五於沭陽之三尖嘴田五放大礮轟斃
陳沛川壯丁十餘人虜去九人田五將九人支解拋
棄河內仍携衆盤踞於清江之漁溝勢頗兇橫余聞
報卽檄河中淮安兩營分派都司一員帶兵二百名
前往緝捕田五得信逃入洪澤湖官兵止拿餘犯數
名不能結案余復訪有向曾販私今已入伍之穆永
昌等能知田五踪跡派令隨同能事幹弁密往查拏

仍懸立重賞拿獲田五給銀三千董際雲二千著名
黨羽各犯一千官兵仍予陞用人人出力不一月將
田五董際雲首夥各犯全行拿獲解省親訊按例分
別凌遲斬梟恭請

王命立時正法其餘各犯問擬軍流編管有差具摺
陳奏奉

上諭鐵保等奏拏獲梟匪慘殺多命首夥各犯審明
分別辦理一摺梟匪田五等在沐陽縣地方聽從董
際雲主使糾眾施放鎗砲拒殺十三命將張允昌等
九人支解致死直同叛逆可恨已極該督等接據稟

報卽分飭地方文武帶同眼目購線訪緝立將田五等首夥各犯拏獲多名所辦尙爲迅速田五馬枚周三纏三犯業據該督等審明照例正法梟示其董際雲等犯卽著刑部速議具奏欽此除應賞銀兩如數飭領出力官弁予以超拔外陳沛川賞給外委頂戴以觀後效此番大加懲創私梟漸皆斂戢矣是年及門吳桓刻惟清齋字帖成

受業宜立樞謹案公素喜書與及門言名書如名士如美人必容貌氣骨精神脈絡色色完備始爭上流近日豐者無骨瘦者不腴氣魄勝者劍拔弩

張風韻勝者柔姿媚態皆非書家正格吾知之愧
未能也公書碑版大楷真得顏法草書學懷素及
十七帖書譜當與會所到有上下百年縱橫萬里
之勢

嘉慶十四年己巳

余五十八歲三月以高堰臨湖爲淮揚兩郡保障前
次加砌磚工不足以資捍禦去年淮黃異漲復多掣
塌奏請普律加砌大石一層以期鞏固得

旨允行

江南爲人文極盛之地而江寧蘇州止有鐘山紫陽

二書院限於膏火人才不能多收余與汪稼門撫軍
等議添設尊經正誼書院尊經以商捐二萬兩生息
爲經費正誼以入官抄產房地銀二萬餘兩爲經費
一切規模與鐘山紫陽等延請耆儒認真督課鄉試
獲雋者甚多因作正誼書院記自書於碑記載集中
江省人多文弱營伍技勇不及別省余謂南方之強
原不敵北人火器弓箭亦何至弱於北人莅任後力
加操練教以長矛連珠箭等技弓力必六力以上每
遇挑選則專以技勇爲準一秉至公不稍假借有志
之士鼓舞振興不假督責各用心學習江寧弓箭兵

九百餘人弓八力至十二力者得四百人余每閱看時賞至數百金或製棉衣單衣按名給賞以故兵丁樂於從事營伍大有起色十二年春余大饗官兵是日請將軍都統較看技勇四百人弓力無八力以下者將軍等大喜過望歡笑終日傳者以爲佳話

城守營兵丁多護送兵餉罪人差使較多公費不敷向由兵丁自行明扣以資路費余慮日久生弊卽於壩費內每年捐銀三百兩交該營充用不准再行明扣每月放餉必令將備將全數送大堂余親自抽驗後再派大員監放絲毫不准短少營務肅清

江南收漕之弊由來已久官吏固不免浮收而生監之不守學規所謂破靴黨者尤專以包漕爲事官不能制最爲漕務之害余赴蘇之前數日卽聞有生監數百人欲控漕務挾制官吏余廉知卽傳諭司道有控必辦不准將就了事此等不肖州縣實不足惜叅辦數員亦於公事有益其包漕各生亦必盡數嚴辦以杜刁風比至蘇竟無一人呈控者余乃親赴紫陽書院齊集諸生剴切曉諭謂士之所重者品學問次之汝等果能安分以讀書爲事則以文會友雖督撫之尊亦我同類必待之以禮推重斯文倘以不干已

事輕入公門則巡檢典史皆得從而侮辱之豈不有玷學校爲吾黨罪人至世宦之家尤應守法卽如本部堂豈肯令子弟作包漕包訟之事自罹法網汝等何可不知自愛反復開導至再至三又每赴各府查閱營伍必先詣書院傳集諸生曉以讀書最貴干訟最賤引至座前不啻館師之訓童蒙者先是江省士風刁健撫軍宜興學政平恕任內俱有罷考爭毆之事余隨時訓戒勸以廉耻曉以利害四年之久並無有秀才滋事之案

淮揚二府爲私梟聚集之所元明以來不逞之徒多

由私販起事後至不可收拾余有鑒於前與鹽政諸公籌議欲由衆商出貲添設遊擊一員兵千名專司捕務格於部議未行時大夥私梟橫行已久官不能制余不得已與鹽政熟籌出貲萬餘金爲緝私公費派督標妥弁五六員各帶兵二十名分路踴緝有犯必獲所得私船牲口全行充賞並查明實心緝捕獲犯較多之員立予陞擢弁兵人人踴躍不及一年拿獲私販二百餘起官引暢行分起具奏得

旨褒嘉

七月以失察山陽縣謀毒冒賑案謫戍烏魯木齊於

十九日去任

笄孝廉立樞廉靜專一之士也性篤師友爲余壬子
典江南所得士時在幕襄理筆札見余年老遠行無
親丁隨往毅然同余赴戍關外奇寒人不能當而此
行自八月至冬月到戍未遇風寒真奇事也

又余以總督轄三省地方肩河漕鹽關重任何時何
事不可以得罪而天僅以失察之咎膺茲薄譴不至
爲

君父所不容鄉黨所不齒且獲咎旣輕

賜環必速每見及此心境豁然烏城都統爲興公名

奎古長厚君子也一見論交愛同骨肉以故在輪臺
八月毫無所苦目力復明臂痛亦愈閉門思過無所
事事閒理舊業臨唐宋人字帖以消長日偶仿放翁
作小詩數首與笄生相唱酬亦不求工適意而已有
玉門詩鈔一卷歸而慶方伯格授之梓

嘉慶十五年庚午

余五十九歲六月奉

旨起用爲葉爾羌正辦大臣旋陞喀什噶爾參贊大
臣七月補授翰林院侍講學士仍留參贊之任余居
輪臺八閱月毫無遷謫意惟聞江南河漕棘手議者

欲改築高堰二隄並請帑百萬添造剝船濟運心竊
以爲非計第以身在謫籍未敢論奏一經起用卽於
謝

恩摺內附片力陳云伏讀

上諭知近日南河又不辦碎石坦坡改築二隄復於
河口議造剝船一千五百隻以備江廣幫盤壩運通
之用二事自爲因時制宜起見惟查高堰石工連年
冲塌歲需銀數十萬兩始議築碎石坦坡以衛石工
止以費重工繁非數年不能蕺事屢議屢止今不做
坦坡改築二隄在高堰之外不能衛護石工幸而無

事二隄仍屬虛設倘竟有疎虞以浮土所築之二隄何能禦全湖之水是以臣前歲面奏請於高堰大隄之後幫作後戩蓋因前歲大水高堰隄面沖至六七丈尙有三四丈未動若再加後戩數丈似可不至漫溢而所費亦不過百十萬金二年中可以集事曾經長麟戴衢亨詳加勘議准行似較改築二隄差爲得力又臣前曾與河臣籌議欲將五壩以下入江之路大加開通盛漲時將信智等壩啓放俾水有去路不至擡高湖面則高堰可免喫重那彥成亦甚主此議奈連年高寶一帶水患漫衍河湖一片無從著手又

錢糧動需一二百萬未敢輕議舉行此係靳輔從前
宣洩湖水之舊規如果能行則高堰不至危險碎石
坦坡與幫做後戩等工俱可不作祈

皇上再令松筠吳璥徐端等詳悉妥議亦保守高堰
之一法也至河口添造剝船盤壩運通偶一爲之尙
可若竟恃有剝船將江廣幫在河口截卸則旗丁所
仗以挽運者全在攜帶土宜稍沾餘潤若在河口盤
壩則貨物不能全行抵通丁力愈疲挽運愈難京師
什物亦必昂貴且以一船之丁舵水手分而爲二又
留人一分送回大船費用亦覺大難是此法只可留

爲萬不得已之一著但有一隻可渡必竭力挽運仍須預催各幫於五月河未捫口以前渡黃全船抵通方於漕務無礙以上二條臣鄙見如此不揣冒昧切實具陳伏乞

皇上再令河漕諸臣通盤熟計事不厭詳或於公事不無裨益奏上奉

上諭據鐵保奏河工漕務二條覽奏俱悉高堰改築二隄一事前經河臣奏請部議卽以二隄較大隄形制卑狹新土浮鬆不能似石工得力是以未經准行現因經理海口尙未辦及碎石坦坡俟海口辦竣之

後此等緊要工程自當以次辦理其清水由五壩以下歸江舊有河道本年高堰各工平穩五壩均未啓放亦非目前要務至河口剝船一事因恐清口淺阻糧船萬一誤運不得已爲此有備無患之計原非經久可行總之海口經理有效則河流順軌清水暢出彼時軍船挽運無阻自可不必藉此也特此諭令知之欽此

喀什噶爾爲回疆總匯地處極邊與外夷接壤懷柔綏靖貴得機宜先是霍罕酋長愛里木驚悍異常蠶食諸部頗有夜郎自大之意本年遣使入貢歸途以

車輛逾額爲地方官執奏夷情謹譁頗勞

宸厯余下車伊始卽專派曉事大員迎往彈壓並飭各城阿奇木預備車輛協濟羣夷帖然至十一月該夷副使西里普在途病故復派明白大員前往經理後事並一面具奏一面給帑優卹俾知

朝廷德意諸夷無不厥角頓顙傾心感戴並將卽行賞卹之處附片陳奏云伏查霍罕僻處西陲兇悍無知全無人理必得示之以威懷之以恩方足以懾其悍驚之氣是以去年伊與那彥成書信語句不馴當卽嚴行批示今輸誠內附遠差貢使又不可不示以

優厚以見

大皇帝撫馭中外

天地覆載之量不以過而廢

大恩是以臣不敢拘泥奏請卽發銀兩以示優卹奉
旨所辦是欽此

又發遣喀什噶爾爲奴當差各犯向無例設口糧舊
於兵丁鹽菜內攤扣給散余以兵丁鹽菜無多而遣
犯愈積愈衆若不明立章程僅令兵丁攤扣殊非政
體卽仿照伊犁當差遣犯日給食麵一觔之例咨部
呈請覆准

允行著永爲例防兵始免攤扣之累

嘉慶十六年辛未

余六十歲向例八城鋪面房間凡官爲建蓋者按間起租若商民於官地內自行建蓋者止取地基租銀核其買賣大小分頭二三等收銀三錢二錢一錢不等所謂屢而不征意至厚也去年十二月葉爾羌忽有增租之奏商民怨咨有舍業而去者余聞卽查明例案據實陳奏迺未經奏到之先

聖意早知其不可已

特旨交余查辦三月余馳往查勘當照向例核定並

通行八城不得擅改舊章致滋紛擾惟另佔官地者始分別等次取租市肆無累商民獲安

各城阿奇木年班入

覲舊例六年一輪往返約須年餘貧乏小伯克頗以爲苦余總計回疆三品阿奇木共有九員若分爲九班可少紓回力因奏請更正云竊臣據阿奇木伯克郡王伊斯堪達爾呈稱八城回子阿奇木伯克等年班瞻

覲之例向係分爲六班每年輪派三品阿奇木一員帶領四品以下伯克九人連領班之員共計十人爲

一班按六年一轉輪流入

覲現在遵行在案伏思我等回民仰賴

大皇帝覆載深恩得以安居樂業卽年年入

覲藉抒依戀之誠亦不爲過何敢妄求展限惟查三品阿奇木共有九人以六班計算止須六人領班其餘三員卽作爲散衆隨同行禮於體制未能一律又四品以下伯克六年一輪往返約須年餘是僅隔四年卽須入京一次在貧乏之家未免拮据若能仰懇大皇帝天恩分爲九班每次仍以三品阿奇木領班人數亦足十人則三品阿奇木伯克俱得輪流領班

各遂其瞻仰之誠四品以下伯克又得展限三年省其往返之費於回人大有裨益臣等伏思我

皇上臨御以來綏靖懷柔所以加惠回民者無微不至若酌改九班每班仍是十人既與向例並無增減而三品阿奇木俱得一律領班四品以下伯克又得寬限三年可以稍省路費一轉移間於回人生計實爲有益奏上奉

上諭鐵保等奏阿奇木伯克入覲年班懇恩展限一摺阿奇木伯克等年班瞻覲之例向係分爲六班每班派三品阿奇木一員帶領四品以下伯克九人該

處三品阿奇木共九員六班輪派領班止須六員其餘三員卽作爲散衆跟隨未免於官制未符且四品以下伯克六年一輪爲期旣速其程途迂遠往返旅費亦未免拮据著照鐵保等所請所有八城回子阿奇木等年班加恩改爲九班俾三品阿奇木俱得一律領班而四品以下伯克亦得稍爲寬假以昭體制而示優卹欽此

三月余查閱各城從前參贊查閱例帶隨轅兵役過多余恐擾累臺站因減而又減所帶文武員弁不過十餘人並自行出貲給與資斧每日按名給散凡一

切回民供給臺站支應概行禁止是以往返五千餘里而官民不擾又以邊疆重地騎射爲先各城內有未設跑馬者復爲奏請添設奉

硃批甚是必須如此辦理欽此

五月阿克蘇山水陡發冲塌城垣一百八十九丈四尺五寸庫房十一間倉房八間滿漢兵房九十八間辦事大臣衙署及印房糧餉局滿漢營員衙署一百九十一間商民鋪面房二百四十九間淹壞回莊九處田地八百一十二畝零淹斃七品伯克一名漢民三名回子四名遣犯一名爲塞上從來未有之事余

以邊地被災一切賑撫機宜尤關緊要聞信後卽晝
夜星馳前往該城查勘首議賑卹回民被災者二百
八十七戶分大小賞給普爾錢文商民無資本者亦
賞給普爾錢文滿漢兵分賞鹽菜銀兩俾其粘補衣
履器具被災田畝應征本年米石懇

恩豁免奏上奉

上諭鐵保等奏阿克蘇被災田地房間數目及軍民
回子寔在情形一摺阿克蘇係回疆遠徼本年五月
間因山水暴發猝被偏災回民不無拮据自應加以
撫卹鐵保此次前往查勘除已將回民二百八十七

戶按照大小口數同其餘窮苦商民均經傳旨分別賞給普爾錢文足資口食又滿漢兵丁房間倒塌衣履損壞亦著卽照鐵保所請分別賞給鹽菜銀兩外至被淹回莊九處共計田地八百餘畝麥苗俱已被壓不能補種所有本年應交糧一百二十五石一斗並著加恩全行豁免又商民房屋二百四十九間每月應征地基銀十四兩七錢著加恩寬免三個月以紓商力再七品伯克伊斯瑪依爾出城探水沖去情殊可憫前經降旨賜卹茲著加恩卽賞給伊長子七品伯克毋庸再議卹典其被淹之回子四名民人三

名著每名各賞銀五兩以示體卹該部知道摺併發
欽此次議修築並以工代賑於城東添築大隄一道
以杜後患一面奏聞一面舉行皆奉

旨依議統計費帑一千餘金爲時五十餘日均已蕆
事從來辦理工賑未有如此簡速者

天子嘉之賞給該城阿奇木緞疋及在工出力員弁
加級有差余有阿克蘇城被水馳往勾當紀事詩見
集中

十月補授浙江巡撫

十一月陞授吏部左侍郎兼管國子監事務

余任喀什噶爾參贊時有回民風土記畧及卡浪圭
異石徠寧果木等記今載文集中

余一身三爲學士一奇也兄弟同爲學士二奇也以
學士兼參贊大臣總理回疆三奇也帖畢之士求一
不得而余一身兼之何修得此書以誌幸

右自序年譜二卷

家大人年六十時在喀什噶爾叅贊任內所序內無一字虛飾凡有關公事者必奉有

諭旨允行始敢序入意在存信以示後人此年譜所由作也是年補授吏部侍郎奉

詔回京十八年正月補授禮部尙書廂白旗漢軍都統四月抵京八月補吏部尙書正藍旗滿洲都統是時逆匪林清滋事

大人不避艱險遇事直陳章數十上

國事不敢存稿時吏部處分繁重各直省官吏才具少

優者多爲處分掛礙不能陞用以故督撫不能得人

大人與同官公議每

召對時細陳利弊

上以爲是兩降

諭旨令吏部核議刪減正在籌辦間因十六年喀什噶爾回民欽錢一案議者以前任叅贊誤聽回民捏稟辦理錯誤

大人視職謫戍吉林到戍後閉門思過日惟以學書自遣凡古人字跡無論大草細書無不臨摹不下數十過至百餘過便中寄京交元等收存元以

老年筆墨恐致散失交善手摹勒六卷以垂久遠二十三年奉

恩旨補授司經局洗馬六月回京供職因

大人在戍所專心八法未免有傷目力至道光元年四月目疾增劇不敢戀位於初八日據實呈請開缺調理經吏部奏明仰蒙

恩旨賞給三品卿銜休致具摺謝 恩并蒙

召見溫語優加體恤倍至元因年譜僅序六十年似應

續行增入

大人謂余六十年以前三任督撫六十年以後奉職不

及一年卽外戍東垂內還翰苑有何足錄徒費文詞可
以不必元謹遵

嚴命不敢復請以副

大人核實存真至意謹述其顛末如此元謹跋